



**Saunia e Lori Fuller**  
Mekasini a le Ekalesia  
E faavae i se tala moni

“O le a ou auuana. Ou te tau mo le mea tonu. O lou Alii Iesu” (Tusipese a Tamaiti, 85).

“E i, vaai i lenei mea.” Sa toso mai e Jack se fasi pepa sa gaugau mai lana taga. “Sa ou mauaina i se mekasini i lenei taeao.” Sa ia talatalaina ma tuu atu ia Taran.

Ae na iloa vave lava e Taran e le o se mea sa ia manao e vaai i ai. Sa ia liliu ese ma fai atu, “Ou te le manao e vaai i ai.”

Sa faamimigi tauau o Jack ma toe tuu le pepa i totonu o lana taga. “Pepe.”

E lei popole tele i ai Taran.

Ina ua taunuu Taran i le fale, sa ia fesoasoani ia Tina i le faiga o falaoa mo le taumafataga o le afiafi. Sa ia tosoina atu se nofoa i le laulau, ma nonoaina e Tina lona talieleele.

“Tina,” sa ia fai atu ai, “ao ou i ai i le fale o Ian, sa tau-mafai lana uo e faaali mai ia te au se ata o se tagata e leai

ni lavalava. Sa ou liliu ese ma savali ese.”

Sa tuu i lalo e Tina le apa o le paluga ma fusi mai Taran. “O se filifiliga lelei tele lena. Faafetai mo le tauina mai ia te au e uiga i ai.”

“I le afiafi o aiga o le mea lena na e fai mai e fai,” na fai atu ai Taran ao ia popoa ona lima i falaoamata ma sii le paluga i luga o le laulau.

“Ou te fiafia na e manatuaina! Pe o le taimi muamua lena ua faaali atu ai e se tasi ia te oe se ata leaga?”

Na lue atu le ulu o Taran.

“Ia, ou te matua fiafia lava ua e tau maia ia te au. E te iloa e mafai ona e fesili mai ia te au e uiga i soo se mea pe tau mai ia te au soo se mea, a ea? E tusa lava pe na e faia se filifiliga le lelei, ou te manao lava ia ou iloa ina ia mafai ai ona ou fesoasoani atu. Ou te le ita.” Sa ia faapai-ina atu sina vaega itiiti o le falaoamata i luga o lona isu.

Sa ataata Taran ma faamaanuminumi lona isu ua falaoamatā. “Ioe. Ou te iloa.”

Ina ua maea le taumafataga o lena po, na fai atu Tama, “I le aso sa taumafai se tasi e faaali atu ia Taran se ata leaga, le ituaiga lea na tatou talanoa i ai i le afiafi o aiga.”

Na lele i luga le lima o Reena i le ea. “Ou te manatua le talanoa e uiga i lena mea!” Sa le lava le matua o Dhara e manatua ai le tele o mea, ae sa luelue mai foi lona ulu.

“O le a la lau mea na fai?” Na fesili atu ai Sonia ia Taran.

“Ou te lei vaai i ai, ma sa ou savali ese,” o le tala lea a Taran.

Sa luelue atu le ulu o Tina. “Ma te matua fiafia lava na fai e Taran se filifiliga lelei. Ma ua ma matuai mitamita lava ia te ia mo le tauina mai ia te au o le mea na tupu.”

Sa aapa atu Tama i le isi itu o le laulau e pa se la lima ma Taran. “Lelei tele, uo.” Na patipati Reena ma Dhara, ma sa tuuina atu e Sonia ia Taran se ataata tele lava.

“O lea la, ina ia faaalua le fiafia ua i ai sa tatou meaai mama faapitoa!” na fai mai ai Tama. Na fiafia *tagata uma* i lena mea.

Sa tu i luga Tina e toso mai le aisa kulimi i fafo mai le pusaaaisa, ae taufetuli atu Taran ma Sonia e aumai ia ipu ma sipuni.

“Ua lelei, uo,” o le tala lea a Tama, ma faasino atu le aisa kulimi ua asu ia Taran. “O le a le lanu e te manao ai?”

A o latou faō ia latou aisa kulimi, na fai atu Tina, “Pau le mea ma te manao ma Tama ia te outou tamaiti e manatua, afai e te popole pe o i ai ni au fesili, e mafai ona e sau i taimi uma lava ma talanoa mai ia i maua, e tusa lava po o le a se mea e tupu. E faafiafiaina ai i ma’ua.”

“Ma maua ai a matou aisa kulimi?” Na fesili atu ai Sonia ao siiina i luga se sipuni ua tumu i le [aisa kulimi] sukalati.

Na ata leotele Tina. “O nisi taimi. Ae o le mea sili lava ma te maua ai le fiafia. Ma ua lava lena mea.”

Na luelue atu le ulu o Taran a o ia faamaeaina lana u mulimuli o le aisa kulimi. O le tau atu ia Tina na ia maua ai foi le fiafia. ■



## LUI O LE FMT

“O le a ou faitau ma matamata na o mea lava e fiafia i ai le Tama Faalelagi”  
(O O’u Tulaga Faatonuina o le Faatalalelei)

Faaitaitai le fai atu leai pe afai e taumafai se tasi e faaali atu ia te oe se mea leaga. Liliu ese ma savali ese.

Talanoa i se matua po o se tagata matua faatuatua e uiga i le mafuaaga e le lelei ai mo i tatou ponokalafi.

Fai se fuafuaga faatasi ma lou aiga. Afai e te vaai i se mea leaga, tau atu i se matua po o se tagata matua faatuatua e se taimi vave lava e tuu ese vave ai lagona le lelei.

Ua ou liliu au lava ina ia . . .